

**Pwyllgor Newid Hinsawdd,  
yr Amgylchedd a Seilwaith**

**Climate Change, Environment,  
and Infrastructure Committee**

**Senedd Cymru**

Bae Caerdydd, Caerdydd, CF99 1SN  
SeneddHinsawdd@senedd.cymru  
senedd.cymru/SeneddHinsawdd  
0300 200 6565

**Welsh Parliament**

Cardiff Bay, Cardiff, CF99 1SN  
SeneddClimate@senedd.wales  
senedd.wales/SeneddClimate  
0300 200 6565

Julie James AS

Y Gweinidog Newid Hinsawdd

10 Mai 2022

Annwyl Weinidog,

**Eithriad i Ddeddf Marchnad Fewnol y DU ar gyfer plastigau untro**

Rwy'n ysgrifennu yn dilyn llythyr y Gweinidog Materion Gwledig a Gogledd Cymru, a'r Trefnydd at y Pwyllgor Deddfwriaeth, Cyfiawnder a'r Cyfansoddiad, dyddiedig 28 Mawrth 2022, lle mae'n cyfeirio at benderfyniad Llywodraeth y DU i ganiatáu eithriad i Ddeddf Marchnad Fewnol y DU ar gyfer plastigau untro.

O ystyried ein diddordeb parhaus yn y gwaharddiad arfaethedig ar blastigau untro, a'n galwadau parhaus am eglurder ar ganlyniad trafodaethau rhynglywodraethol ynghylch eithriad posibl i'r Ddeddf, rydym yn siomedig i beidio â bod wedi cael y wybodaeth ddiweddaraf gennych. I'r perwyl hwn, byddem yn ddiolchgar pe gallech roi sylw i'r cwestiynau a nodir yn y llythyr hwn.

Deallwn y byddai'r eithriad wedi cael ei ystyried a'i gytuno yn unol â'r prosesau sefydledig a nodir yn y Fframwaith Cyffredin ar Adnoddau a Gwastraff ('y Fframwaith'). Nodwn nad yw'r Fframwaith wedi'i gyhoeddi eto ac nad yw ar gael ar gyfer craffu seneddol, ac y bu oedi parhaus o ran ei gyhoeddi. Rydym yn pryderu am y diffyg tryloywder yn y broses o wneud penderfyniadau, a'r ddibyniaeth ar ddarpar Fframwaith nad yw wedi'i gyhoeddi eto fel sail ar gyfer ystyried a chytuno ar yr eithriad.

1. A allwch roi syniad pryd y bydd y darpar Fframwaith ar gyfer Adnoddau a Gwastraff ar gael i graffu arno ac egluro'r rheswm dros yr oedi parhaus cyn ei gyhoeddi?



2. Er ein bod yn cydnabod bod y cais am yr eithriad wedi deillio o Lywodraeth yr Alban, mae'n ymddangos y bydd Llywodraeth Cymru yn dibynnu ar yr eithriad i fwrw ymlaen â'i chynigion i wahardd plastigau untro. A allwch gadarnhau bod hyn yn wir?

3. Yn absenoldeb y Fframwaith Cyffredin ar Adnoddau a Gwastraff, a allwch amlinellu'r prosesau ar gyfer ystyried a chytuno ar yr eithriad?

Yn ei llythyr, mae'r Gweinidog Materion Gwledig a Gogledd Cymru, a'r Trefnydd yn cyfeirio at siom Llywodraeth Cymru ynghylch "natur gul yr eithriad".

4. A allwch roi manylion am yr eithriad ac egluro ym mha ffordd y mae'n gulach nag yr oeddech chi a'ch gweinidog cyfatebol yn Llywodraeth yr Alban wedi gobeithio amdano?

Mae'r broses ar gyfer ystyried eithriadau i Farchnad Fewnol y DU mewn meysydd Fframwaith Cyffredin yn nodi bod y pedair llywodraeth yn gallu defnyddio'r mecanwaith datrys anghydfodau o fewn y Fframwaith perthnasol os ydynt yn dymuno.

5. A allwch egluro a ddefnyddiwyd y mecanwaith datrys anghydfodau gyda'r nod o sicrhau eithriadau ehangach? Os na, pam felly?

6. A allwch egluro a fydd "natur gul yr eithriad" yn effeithio ar gwmpas y gwaharddiad arfaethedig ar blastigau untro yng Nghymru, ac os felly, sut y bydd yn effeithio arno?

O dan y Ddeddf, mae angen cymeradwyaeth dau Dŷ Senedd y DU ar gyfer diwygiadau i'r atodlenni sy'n cynnwys eithriadau. Yr Ysgrifennydd Gwladol sy'n gyfrifol am sicrhau bod rheoliadau drafft yn cael eu rhoi gerbron Senedd y DU. Cyn gwneud rheoliadau, rhaid i'r Ysgrifennydd Gwladol ofyn am gydsyniad y gweinyddiaethau datganoledig.

7. Pa drafodaethau ydych wedi'u cael gyda Llywodraeth y DU ynghylch amseriad rheoliadau drafft a fydd yn rhoi effaith i'r eithriad?

8. A allwch gadarnhau y byddwch yn rhoi gwybod i'r Senedd pan gaiff y rheoliadau drafft eu gosod gerbron Senedd y DU?

9. A allwch gadarnhau y byddwch yn ceisio barn y Senedd cyn penderfynu a ddylid rhoi cydsyniad i'r Ysgrifennydd Gwladol wneud y rheoliadau? Os felly, a allwch roi syniad pryd y mae hyn yn debygol o fod a pha broses rydych yn bwriadu ei dilyn?

Ym mis Medi 2021, gwnaethoch ddweud wrthym y byddai ymateb Llywodraeth Cymru i'r ymgynghoriad ar y gwaharddiad arfaethedig ar blastigau untro, gan gynnwys y camau nesaf, yn cael ei gyhoeddi ym mis Hydref 2021. Eto, ym mis Rhagfyr 2021, gwnaethoch ddweud y byddai'r ymateb yn cael ei gyhoeddi ym mis Ionawr 2022. Nid yw'r ymateb wedi'i gyhoeddi eto.

10. A allwch gadarnhau amseriad cyhoeddi'r ymateb ac egluro'r rheswm dros yr oedi parhaus?

Byddwn yn ddiolchgar pe gallech ymateb i'r cwestiynau uchod cyn gynted â phosibl, ac erbyn 24 Mai fan bellaf.

Rwy'n anfon copi o'r llythyr hwn at Huw Irranca-Davies AS, Cadeirydd y Pwyllgor Deddfwriaeth, Cyfiawnder a'r Cyfansoddiad.

Yn gywir

A handwritten signature in black ink, appearing to read 'Llyr', is centered on a light-colored rectangular background.

Llyr Gruffydd AS,  
Cadeirydd, y Pwyllgor Newid Hinsawdd, Yr Amgylchedd a Seilwaith

